

даралап, ерекше тұлға екенін айшықтайды. Сыр мен сымбаты келіскен жеке тұлғасы ізгіліктің, пайым-парасаттың үлгісіндей болып шәкірттерінің жүрегіне кісілік дәнін себеді. Ұстаздың өмірлік тәжірибесінің, тәлім-тағылымдамасының шәкірттері үшін орны бөлек.

Тәлімгер-ұстазымның кісілік келбеті мен адами асыл қасиеттері мен үшін де жоғары, өзгеше дара, болмысы бөлек тұлға. Апайдың кісіні жатсынбайтын тартымдылығы мен өзіне тән қарапайымдылығы бар. Ұжымдағы әріптестеріне сыйлы, жігерлі, өте еңбекқор, рухани адамгершілікті биік тұғырға қондырған ардақты жан. Мен ғалым-ұстаз апайымның талант ерекшелігіне, рухани келбетіне, парасаттылығына, білімділігіне тәнтімін. Аналық ақыл-кеңестерін тыңдадым, жанашырлықпен айтқан ақ пейілін, жақсыға баулыған адал көңілін сезініп келемін.

Қымбатты Шара Мажитайқызы! Мерейлі 70 жасыңыз құтты болсын! Сіздің отбасыңызға амандық, деніңізге саулық тілеймін, ұзақ ғұмырлы болыңыз, ғылымның игілігіндегі барлық істеріңізге сәттілік тілеймін. Сіздей ұстаздың шәкірті болғанымды мақтан тұтамын, шәкірттерінің жүрегіне жол таба білген, білім нұрын төге білген ұстазыма шәкіртінен мың тағзым!

Пайдаланылған әдебиет:

1. Мажитаева Ш. XX ғасыр басындағы қазақ әдеби тілі. Оқу құралы. Қарағанды: ҚарМУ баспасы, 2007. – 234 б.

А.А.Сатбекова

педагогика ғылымдарының докторы, профессор ҚазҰлтҚызПУ,
«ЖОО Үздік оқытушысы» мемлекеттік грантының иегері,
Қазақстан Педагогикалық Ғылымдар Академиясының академигі

ҮЗДІК ҰСТАЗДЫҢ ҰЛАҒАТЫ

Белгілі ғалым, ұлт қайраткері Евней Бөкетов: «Парасаттылық, шарапаттылық, кеңдік, адалдық ғылымда қызмет істеген әрбір адамға лайық, халқымыздың мәпелеп, бетке ұстары-ғылым адамдары»-деген екен.

Қазақ және жалпы тіл білімі саласының маманы Ш.Мажитаева – 300-ден астам ғылыми мақала, ғылыми-әдістемелік еңбектер, монографиялар мен оқу құралдарының авторы. Ғалымның қазақ әдеби тілі тарихына арналған “XX ғасырдың 20-30-жылдарындағы қазақ әдеби тілінің мәселелері” /1997/, “XX ғасырдың бірінші жартысындағы қазақ әдеби тілі” /1999/, «XX ғасырдағы қазақ әдеби тілі» (Астана: Елорда, 2001) атты монографиялары қазақ әдеби тілі тарихын зерттеушілер мен филология факультетінің студенттері мен магистранттары үшін аса қажетті еңбектер қатарына жатады. Зерттеуші жарты ғасырдағы жарық көрген мерзімді баспасөз, көркем әдебиет, ғылыми әдебиет және іс-қағаздары мен кеңсе тіліне байланысты материалдарды қарастырып, солардың негізінде әдеби тілдің дамуына талдау жасайды.

Филология ғылымдарының докторы, профессор Шара Мажитаева – 2003-2008 жылдар аралығында Қазақ ұлттық қыздар педагогикалық университеті жанындағы Қазақстан, Өзбекстан, Қырғызстанның белгілі ғылым докторларынан тұратын БД 14.50.17 Біріккен докторлық диссертациялық кеңестің мүшесі болды. 10.02.02-қазақ тілі, 10.02.19-тіл теориясы, 10.02.01-орыс тілі, 10.02.10-Қазақстан Республикасы халықтарының тілдері, 13.00.02-оқыту және тәрбие теориясы мен әдістемесі (бастауыш, орта және жоғары білім беру жүйесіндегі қазақ тілі) мамандықтары бойынша республикамызда ғылым докторлары мен кандидаттарын дайындау ісіне зор үлес қосты. Ғалым Ш.Мажитаева ұстаздық, ғалымдық пен ұйымдастырушылық қызметтерін өзара ұштастыра білген бірегей тұлға.

«Қазақстан Республикасы білім беру ісінің құрметті қызметкері», «Е.А.Бөкетов атындағы Қарағанды мемлекеттік университетіне еңбегін сіңірген қызметкер» атағының иегері, «Жоғары оқу орнының үздік оқытушысы» мемлекеттік грантының екі мәрте иегері, профессор Шара Мажитайқызы туралы сөз қозғағанда оның бойындағы ең ізгі қасиеттер – қарапайымдылық, кішіпейілділік, еңбекқорлық жайында айтпай өту мүмкін емес. Ол өзінің ізденімпаздығының, тынымсыз еңбегінің арқасында бүгінгідей дәрежеге жетті.

Ғалымның алыс –жақын шет елдерде жарық көрген еңбектеріне Қырғызстанда жарияланған «Қазақ тіліндегі ғылыми стильдің қалыптасу тарихы» атты монографиясы мен Өзбекстанда шыққан

«Фразеология русского языка: лингвистические и методические проблемы» атты монографиясы, сондай-ақ «Цветобозначение в составе фразеологизмов: лингвокогнитивный анализ» атты ұжымдық монографияларын жатқызуға болады.

Зерттеу өрісінің кеңдігі және ғылыми-зерттеу жобаларына қатысу оған зерттеу жұмысының сапасын және магистранттар мен докторанттардың біліктілігін арттыруды қамтамасыз ететін өзінің ғылыми мектебін құруға зор мүмкіндік берді. Профессор Ш.Мажитаеваның ғылыми жетекшілігімен 4 ғылым кандидаты, 2 PhD философия докторы, 30 филология магистрі дайындалды. Профессор Ш.Мажитаеваның 20-дан астам ғылыми мақалалары Web of Science, Scopus базасындағы журналдарда жарық көрді.

Білім берудің көкейкесті мәселелері бойынша халықаралық, республикалық ғылыми-практикалық конференциялар мен семинарларға ұдайы атсалысып, үн қосады.

Шара Мажитайқызына тән адами қасиеттер-ішкі рухани байлығы, асыл адами қасиеті, кішіпейілділігі, еңбекқорлығы, парасаттылығы.

«Ұстаздық ету – уақыт ұту емес, өзгенің уақытын аялау, өзіңнің уақытыңды аямау», депті шығыстың бір ғұламасы. Бұл ұлағатты сөз бейнебір біздің мақаламыздың кейіпкері Шара Мажитайқызына арналып айтылғандай. Өйткені, ол өзінің қымбат та асыл уақытын шәкірттерінің бойындағы қасиеттерді дер кезінде танып ашуға, дамытуға арнауда әркез басқаларға үлгі-өнеге бола білуде. Иә, ғасырлар жылжып өтсе де «Ұстаз» сөзінің мән-мағынасы өзгермек емес. Жалпы ұлтжанды білімді жастар тәрбиелеу – аға буын өкілдерінің алдындағы борыш.

Шара Мажитайқызы – білімді де білікті ұстаз, жастардың ақылшысы, жанашыры. Ол әр шәкіртіне ұл-қызындай қарайды. Шәкірттерін білім нәрімен сусындатып, тәлім-тәрбие беріп, жақсы қасиеттерді бойына дарытып, адамгершілік рухта бағыт-бағдар беруде ұстаздың еңбегі зор. Сондықтан да ол әрдайым қасиетті тұлға ретінде ерекшеленеді. Ол жаңалыққа ұмтыла білетін, ізденімпаз, білімді, еңбексүйгіш, парасатты, адал, мейірімді, талапшыл, жаны сұлу ұстаз.

Академик Е.А. Бөкетов атындағы Қарағанды университеті филология факультеті қазақ тіл білімі кафедрасының еңбек сіңірген профессоры, филология ғылымдарының докторы, профессор **ШАРА МАЖИТАЕВАНЫҢ** 70 жасқа толуына орай өткізіліп отырған «*Тілдік тұлға және қазіргі филология мәселелері*» атты республикалық ғылыми онлайн конференция жұмысына сәттілік тілеймін.